

共同經課 - 1 何西亞書一章二節~十節

2 耶和華起頭對何西阿講的話是按呢，耶和華對何西阿講：「你著去娶淫婦做某，也得著對淫亂所生的子；因為此個地方大行淫亂，離開耶和華。」3 對按呢，伊就去娶德拉音的查某子歌蔑。婦仁人懷孕，給伊生一個子。4 耶和華對伊講：「給伊名叫耶斯列；因為閣霎仔久，我欲辦耶戶的家仔耶斯列剖人流血的罪，也欲互以色列家的國無去。5 到彼日，我欲仔耶斯列平洋邊折以色列的弓。」6 婦仁人閣懷孕生一個查某子，耶和華對何西阿講：「給伊號名羅路哈瑪；因為我無欲閣憐憫以色列家，決斷無赦免 in。」7 總是我欲憐憫猶大家，用耶和華——in 的上帝救 in，唔是用弓、用刀、用交戰、用馬，及用馬兵來救 in。」8 羅·路哈瑪斷奶了後，婦仁人閣懷孕生一個子。9 耶和華講：「著給伊號名叫羅·阿米；因為恁唔是我的百姓，我也唔做恁的上帝。」10 總是，以色列的人額欲親像海沙，袂量得，袂算得。前仔甚麼所在對 in 講「恁唔是我的百姓」，將來仔遐欲對 in 講「恁是永活上帝的子」。

共同經課 - 2 詩篇八十五篇

1 〔可拉的後裔的詩，交互樂官。〕耶和華啊，你已經施恩仔你的地，雅各受掠的人你救伊倒來。2 你赦免你的百姓的罪惡，你遮蓋 in 一切的罪過。(細拉) 3 你收回你一切的受氣，息你猛烈的受氣。4 救阮的上帝啊，求你互阮倒轉，息你向阮的受氣。5 你欲受氣阮到永遠嗎？你欲將你的受氣留到萬代嗎？6 你豈唔閣將阮救活，互你的百姓因為你來歡喜嗎？7 耶和華啊，求你互阮看見你的慈愛，閣將你的救恩賞賜阮。8 我願聽全能的耶和華所欲講的；因為伊欲對伊的百姓，及伊聖的百姓講平安；總是 in 唔通閣去濫糝行。9 伊的救恩實在近仔驚畏伊的人，互榮光踮仔咱的境內。10 慈愛及真實相抵著；公義及平安相咬嘴。11 真實對地裡發生；公義對天看落來。12 耶和華欲賞賜好物；咱的土地欲出伊的土產。13 公義欲行仔伊的頭前，互伊的腳跡成做路。

共同經課 - 3 歌羅西書二章六節~十五節，十六節~十九節

6 所以恁既然接納主基督耶穌，就著照按呢 tiam 仔伊來行，7 已經釘根仔伊，就直直受起造，對信來堅固，照恁所曾受的教示，滿滿感謝。8 著謹慎，免得互人用伊的哲學及空空的無影話來迷惑恁，照人的遺傳，照世間的小學，唔是照基督。9 因為上帝性質的豐盛攏齊備 tiam 仔伊，10 恁 tiam 仔伊也得著豐盛。伊是一切辦政事掌權者的頭。11 tiam 仔伊恁也已經受割禮，唔是用手來行的割禮，就是基督的割禮，褪去肉體的身軀。12 已經仔洗禮及伊同埋葬，就仔此個洗禮也及伊同起來，是對信上帝的功用，就是對死人中互伊起來的。13 閣恁前為著罪過及肉體的無割禮來死的，今上帝互恁及基督同復活，已經赦免咱攏總的罪過；14 擦消攻擊咱諸個規例的字樣，就是對敵咱的，釘伊仔十字架，來對中間除伊。15 既然敗許個辦政事的、掌權的，就公行顯明 in，仔十字架贏 in 來大悅。16 所以，莫得因為所食所飲的，抑是為著節期、初一，以及安息日的緣故，互人擬議。17 諸個攏是將來的事的影；若是形就是基督的。18 莫得互人搶恁的報賞，in 故意謙卑敬拜天使。倚靠 in 所有看見的，照 in 肉體的心志，干單啲 phong 風，19 無連住仔彼個頭。全身是倚靠彼個頭，對諸個節及筋得著接應聯絡，照上帝所賞賜的長成來長成。

共同經課 - 4 路加福音十一章一節~十三節

1 耶穌仔一所在祈禱；已經息，伊的學生一人對伊講：「主啊，教示阮祈禱，親像約翰也曾教示伊的學生。」2 伊就給 in 講：「恁祈禱的時，著講：父啊，願你的名聖。你的國臨到，3 阮的日食，日日互阮。4 赦免阮的罪，因為阮也赦免辜負阮的人。莫得導阮入仔試。」5 閣對 in 講：「恁甚麼人有朋友，你半暝去尋伊，給伊講：『朋友啊！提三個餅借我；6 因為我有朋友對路裡來尋我，我無物通請伊。』7 伊對內面應講：『莫得嘈齷我，門已經關，罔仔及我仔床裡，我袂得通起來提互你。』8 我給你講，雖然無為著伊做朋友起來提互伊，猶久為著伊的迫切，欲起來照伊所欠用的互伊。9 我閣給恁講，求，就互恁；尋，就抵著；拍門，就給恁開。10 因為，見若求的，得著；尋的，抵著；拍門的，給 in 開。11 恁叨落一個做父的，有子來討餅，豈欲將石頭互伊嗎？抑是欲魚，豈欲將蛇准做魚互伊嗎？